



9. august 2013

UKA 2013/66

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Angajoqqaat meeqqaminnik arsaagaasimasut angusassamik toraagaqarluni suliniarfigineqarnissaannut siunnersuusioqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Angusassamik toraagaqarluni suliniarnermi siunertarinqassaaq 2014-imi upernaanerani ataatsimiinnissami, angajoqqaat meeqqaminnik arsaagaasimasut angajoqqaatut isumassuisinnaanikkullu nukit-torsarneqarnissaat, taamaasillutik meeqqat angajoqqaaminnut angerlaqqissinnaaqqullugit.

(Inatsisartunut ilaasortaq Jens B. Frederiksen, Demokraterne)

Tunngavilersuut:

Meeqqanik inuusuttunillu angerlarsimaffiup avataanut inissiissarneq pillugu misissuineq 1994-mi saqqummiunneqarpoq, tassani takutinneqarpoq meeqqat 0-niik 17-nut ukiullit 4,3 procentii 1992-mi angerlarsimaffiup avataanut inissinneqarsimasut. 2006-mi kisitsit taanna annertuseriarpoq, meeqqat inuusuttullu 6 procentiisa missaat angerlarsimaffiup avataanut inissinneqarsimammata.

Akileraarneq Tungiuinerlu pillugit isumalioqatigiisit naluaraanni naqissuserneqarpoq, meeqqat isorliunerusuni nunaqarfinnilu inuusut, sualummik Avannaani Tunumilu, ulorianartorsiornerusartut meeqqanut illoqarfinni annerni najugaqartunut naleqqiullugit taamaattumik pisariaqarpoq annertuumik suliarneqarinnissaa, sumiiffinni meeraannaanngitsut aammali ilaqutariit atugai pitsanngorsarniarlugit. Tamanna Naalakkersuisut Kommunillu pinaveersaartitsinerlut allatigullu suliniuteqarnermut atatillugu nakkutiginerusariaqarpaat.

Demokraatini siunnersuuteqarnitsigut paasivarput nunami maani sumiiffiit ilaannit ilaqutariit atugaannik pitsanngorsaaniarneq taakkulu meeqqaminnik isumaginnillaqqissinerunissaat pillugu inuunerinnik naleqarnerulersitsiniarneq iluatsissimanngitsut. Tamanna ajuusaarnaqaaq. Taamaattumik immikkut suliniuteqarnissaq pisariaqarpoq.

Siunnersuummi siunertaraarput angajoqqaat meeqqaminnik arsaagaasimasut pillugit suliniarnissamat pilersaarummik saqqummiussisoqassasoq, Demokraatini innersuussutigissavarput, suliniutissat pillugit pilersaaruserneq kommunit suleqatigilluinnarlugit ingerlanneqartariaqarmat.

Demokraatini aamma piumasarissavarput suliniutissat pillugit pilersaarut kingusinnerpaamik ukioq qaangiuppat nalilersorneqassamat, paasiniarlugu anguniakkat qanoq angulertorneqarsi-



matiginersut. Suliniutissanut pilersaarut naleqqussartariaqarpat, nukittorsartariaqarpat, Demokraatini piumassuseqarluarpugut suleqataanissatsinnut.

Pisortanut aningaasaqarnikkut allaffissornikkullu kingunissai.

Suliniutissat pillugit pilersaarusiorneq pisortanut aningaasaqarnikkut allaffissornikkullu kinguneqassaaq. Naatsorsuutigineqanngilarli aningaasartuutit ukiumoortumik AC-mut aningaasartuutaasartut sinnerumaarai. Aningaasat Ilaqutariinnermut Naalackersuisoqarfiup maanakkut missingersuutaanni nassaarineqassapput, Demokraatinili piareersimavugut politikkikkut isumaqatigiinniarnissamut aningaasat pisariaqartinneqartut pissarsiariniarlugit. Immikkut suliniuteqarneq iluatsissappat pisortat angerlarsimaffiup avataanut inissiisarnerat annertuumik sipaarfigineqassaaq.

Namminersorlutik inuussutissarsiortunut aningaasaqarnikkut allaffissornikkullu kingunissai.

Namminersorlutik inuussutissarsiortunut aningaasaqarnikkut allaffissornikkullu kinguneqassanngilaq.

Innuttaasunut aningaasaqarnikkut allaffissornikkullu kingunissai.

Innuttaasunut aningaasaqarnikkut allaffissornikkullu kinguneqassanngilaq.